

FJALA E DEPUTETIT ISUF ÇELAJ

E ENJTE 14 TETOR 2021

Të nderuar qytetarë të Shqipërisë,

Të dashur vëllezër e motra tropojanë,

Sot do të flas në këto minuta për hallet dhe problematikat që ju shqetësojnë. Si deputet i lidhur ngushtë me Tropojën, kam detyrimin sot të ngre zërin për gjendjen në të cilën ndodhet treva ime, banorët fisnikë të Malësisë së Gjakovës, si pasojë e harresës së shtetit, në fakt, përkufizimi i duhur do të ishte e mungesës totale të shtetit, duke na renditur si rrethin dhe qarkun më të varfër në Shqipëri, me emigracionin më të madh; fshatra dhe krahina të tëra të braktisura. Kanë kaluar tetë vjet nga qeverisja juaj e “Rilindjes” dhe në Tropojë nuk është parë asnjë metër asfalt rural, flas për rrugët e fshatrave; investimi i fundit në këtë infrastrukturë është në vitin 2013, në qeverisjen e Partisë Demokratike. Është për të ardhur keq, pasi këto zona të thella malore, për mungesë të infrastrukturës, mbeten të izoluar dhe në pamundësi për të zhvilluar bujqësinë dhe blegtorinë, pasi nuk i nxjerrin dot prodhimet e tyre në treg. I gjithë munda i tyre, të dashur deputetë, shkon dëm dhe prodhimet e tyre i merr lumi, jo në kuptimin figurativ, por me të vërtetë i merr lumi.

A e dini ju, të nderuar kolegë deputetë dhe ju ministra të kësaj qeverie, se malësorët punëtorë të Tropojës nuk kanë asnjë mundësi tjetër jetese, duke përjashtuar bujqësinë, blegtorinë dhe turizmin malor? Nuk e dini, se po, ta dinit, nuk e kishit lënë të mjeruar dhe të harruar këtë trevë dhe, nëse e dini, atëherë shumë më keq. Kjo do të thotë se e keni lënë vetë mjerimin ta pushtojnë Tropojën dhe tropojanët, përderisa ata nuk ju kanë votuar, por ju jap fjalën se as kanë për t’ju votuar në të ardhmen! Fermerët dhe blegtorët e Tropojës të vetmen mundësi kanë ta hedhin vështrimin matanë kufirit, ku me një mijë peripeci do t’u duhet të kalojnë për shitjen e prodhimeve të tyre te vëllezërit e tyre të Kosovës. Ata edhe qumështin dhe djathin nuk kanë mundësi ta tregtojnë në Tropojë, por janë të detyruar ta çojnë në Kosovë, pasi në rrethin e Tropojës nuk ka as edhe një baxhë për përpunimin e qumështit. Kolegë të dashur, ata banorë nuk kanë asnjë mundësi dhe përditë e më shumë ndihen të braktisur dhe shikimin e kanë nga pjesa e Kosovës. A thua se nuk e kanë shtetin e tyre që mendojnë gjithnjë e më shumë të bashkohen me vëllezërit e tyre të Gjakovës, të Pejës, Prizrenit apo të Fushë-Kosovës?! A e dini ju se ata pak të rinj dhe të reja që kanë mbetur, por edhe prindërit e tyre më të moshuar, marrin një trastë me bukë e dalin të kërkojnë punë në qendrën e Gjakovës, sepse në qytetin e tyre nuk ofrohet asgjë për ta? Asnjë mundësi! Çdo ditë u duhet që fatin e tyre ta kërkojnë gjetkë. Tropoja i numëron me gishtërinjtë e dorës bizneset që ofrojnë punësim, ndaj edhe të rinjtë të vetmen zgjidhje kanë të ikin. Në Tropojë nuk ka asnjë investim të rëndësishëm, ani pse ka pasuri të paimagjinueshme nëntokësore dhe mbitolkësore. Tropoja ka masivet e gështenjave, por trungjet e tyre po degradojnë nga sëmundjet dhe faktorët e tjerë atmosferikë, pasi nuk ka një projekt nga qeveria juaj që të investohet në mbrojtjen dhe investimin e tyre. Po ashtu, pjesa e madhe e prodhimit kalbet në tokë dhe nuk kanë ku t’i çojnë. Në fshatra nuk gjen më asnjë të ri, madje edhe ata, që i kanë mbijetuar valës së emigracionit dhe i kanë ndjekur studimet në Tiranë, nuk kthehen më, rrinë në Tiranë, duke e braktisur vendlindjen e tyre të pasur dhe punojnë kamerierë apo në call-center; qëndrojnë në Tiranë me shpresën që të ikin jashtë, pasi në vendlindjen e tyre nuk kanë asnjë mundësi që të bëhen fermerë dhe të sigurojnë jetesën e tyre, pasi shohin se si ky vend është braktisur, pra atyre u është vlarë shpresa! Kapja e çdo institucioni nga “Rilindja” ka bërë që qytetarët e kësaj zone të humbasin shpresën, besimin se fëmijët e tyre kanë një të ardhme këtu.

Ju që në vitin 2013 trumbetuat me të madhe sloganin “Qeveri e shërbimit dhe e shërbesave për qytetarët” a e dini se në Tropojë nuk ofrohet asnjë shërbim? Të gjitha shërbimet i keni centralizuar në Kukës. Madje, së fundi, lajmi i kobshëm për Tropojën këtu është se edhe Gjykatën e Faktit në Tropojë ju e keni futur në planin e shkrirjes. Këta ministra, ata zyrtarë që merren me këto projekte besoj se nuk kanë qenë në Tropojë, por e dinë atë vetëm në hartë. Të bësh 220 kilometra për një vërtetim pensioni, vërtetim takse për shkollë, për të hapur një çështje në gjykatë, i thonë strapacim dhe mundim për ta.

Prandaj u bëj thirrje organeve drejtuese të drejtësisë, ministrit të Drejtësisë, Presidentit që për specifikën që ka Tropoja të rishikohet harta gjyqësore për Tropojën. Ju faleminderit!